

CONVENIO DE COLABORACIÓN ENTRE A CONSELLERÍA DE VIVENDA E PLANIFICACIÓN DE INFRAESTRUTURAS, A CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL, A AXENCIA DE PROTECCIÓN DA LEGALIDADE URBANÍSTICA E O COLEXIO OFICIAL DE ARQUITECTOS DE GALICIA NO MARCO DO PROXECTOTERRA.

REUNIDOS

Dunha parte, o Sr. Román Rodríguez González, conselleiro de Educación, Ciencia, Universidades e Formación Profesional, actuando no exercicio do seu cargo, en virtude do Decreto 44/2024, do 14 de abril (DOG núm. 73, do 14 de abril) e en función das atribucións que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Doutra parte, a Sra. María Martínez Allegue, conselleira de Vivenda e Planificación de Infraestruturas, actuando no exercicio do seu cargo, en virtude do Decreto 44/2024, do 14 de abril (*Diario Oficial de Galicia* núm. 73, do 14 de abril) e en función das atribucións que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Doutra parte, a Sra. María Victoria Núñez López, directora da Axencia de Protección da Legalidade de Protección Urbanística, actuando en virtude das facultades representativas que lle atribúe o artigo 18 g) do Decreto 213/2007, do 31 de outubro, polo que se aproban os Estatutos da Axencia de Protección da Legalidade de Protección Urbanística, logo de autorización do seu Consello Executivo.

E doutra, o Sr. Luciano González Alfaya, na súa condición de Decano-Presidente do Colexio Oficial de Arquitectos de Galicia, actuando en virtude das facultades representativas que lle atribúe o artigo 11 dos Estatutos Xerais dos colexios de arquitectos e do seu Consello superior, aprobados polo Real Decreto 129/2018, do 16 de marzo, polo que se aproban os Estatutos Xerais dos Colexios de Arquitectos e de seu Consello Superior (*Boletín Oficial del Estado* núm. 89, do 12 de abril de 2018) e o artigo 38 a) do Decreto 105/2016 polo que se aproban os Estatutos do Colexio Oficial de Arquitectos de Galicia (DOG núm. 153, do 12 de agosto).

As partes recoñécense mutuamente na calidade en que interveñen con capacidade legal necesaria e

EXPOÑEN

I.- Que é de interese común das partes actuar de forma coordinada para a realización de traballos que permitan un maior coñecemento, interese e importancia da incidencia sobre o territorio da actividade humana, no ánimo de acadar unha mellor e maior implicación da cidadanía na calidade da construción dos espazos que habitamos ao servizo dunha mellor calidade de vida, e incidindo nun mellor coñecemento e respecto da nosa ordenación urbanística, paisaxe e territorio.

II.- A Xunta de Galicia, a través da Consellería de Vivenda e Planificación de Infraestruturas, exerce as competencias de dirección e coordinación das actuacións en materia de ordenación do territorio e urbanismo, exercendo, entre outras, funcións de:



- Definición, programación e execución da política de ordenación do territorio e urbanismo da Xunta de Galicia, así como a elaboración das disposicións que procedan.
- Elaboración de plans, proxectos, estudos e instrumentos de ordenación do territorio e urbanismo.
- Fomento do planeamento e da actividade urbanística.
- Control do uso do solo, fomentando a utilización racional e ordenada do noso territorio, mediante as actuacións de disciplina urbanística.

III.- A Consellería de Educación, Ciencia, Universidades e Formación Profesional exerce as competencias e funcións en materia de planificación, regulación e administración do ensino regrado e por medio do Plan Proxecta+ colabora de xeito continuado con distintos organismos para facilitar a integración nos centros de ensino non universitario de programas educativos que estean comprometidos cos ODS e que fomenten o papel activo do alumnado ante os desafíos sociais, económicos e medioambientais da sociedade actual e do futuro. Estes programas inciden en aspectos clave da adaptación do sistema educativo aos retos de carácter global redundando na mellora educativa do alumnado participante. Enmarcado no Plan Proxecta+ atópase "Proxecto Terra", un proxecto interdisciplinar, competencial e colaborativo, dirixido ás distintas etapas educativas e orientado a mellorar no alumnado a percepción do hábitat humano desde a perspectiva da paisaxe, do territorio, do urbanismo, da arquitectura e do medio ambiente.

IV.- A Axencia de Protección da Legalidade Urbanística, creada pola Lei 15/2004, do 29 de decembro, pola que se modifica a Lei 9/2002, de 30 de decembro, de ordenación urbanística e protección do medio rural de Galicia, está adscrita organicamente á Consellería de Vivenda e Planificación de Infraestruturas, sendo un instrumento fundamental para velar pola utilización racional do solo conforme ao disposto na normativa reguladora do urbanismo, a ordenación do territorio e do litoral, especialmente no medio rural e na zona de servidume de protección do dominio público marítimo terrestre. Para cumprir este fin, ademais de exercer as competencias específicas en materia de disciplina urbanística e de costas, aposta decididamente pola divulgación, sensibilización, concienciación e a formación como instrumentos esenciais para concienciar no respecto polo noso territorio, posto que comprender a complexidade do territorio e da paisaxe e aprender dos elementos que a compoñen é fundamental para que as sociedades actual e futura realicen un uso responsable e sustentable do territorio.

V.- O Colexio Oficial de Arquitectos de Galicia, de acordo cos seus estatutos asume, entre outras, funcións de asesoría e colaboración estable con diversos organismos e institucións coas que comparte obxectivos e intereses disciplinares, desenvolvendo un labor de cooperación na mellora da ensinanza e da investigación da arquitectura e do medio ambiente. Dentro deste ámbito funcional, coa finalidade de contribuír a que a arquitectura, o territorio e a paisaxe se perciban como piares básicos da nosa cultura, desde o ano 2000 está a desenvolver o «ProxectoTERRA», un proxecto integrado no Plan Proxecta da Consellería de Educación, Ciencia, Universidades e Formación Profesional, dirixido ás distintas etapas educativas e orientado a mellorar o coñecemento que a poboación escolar galega debe ter da nosa arquitectura e da nosa identidade territorial, tratando de crear unha poboación crítica e propositiva sobre o noso medio construído para acadar unhas mellores condicións de vida para todas as persoas, atendendo á premisa do dereito ao hábitat.



VI.- A relación entre o Colexio Oficial de Arquitectos de Galicia e a Xunta de Galicia é permanente, xa que as competencias de intervención e ordenación territoriais, urbanísticas, de construción de vivendas, etc., son obxecto de proxectos da área de competencia do colectivo de arquitectos e arquitectas, o que implica a necesidade permanente de relación e colaboración coa Administración da Comunidade Autónoma. De xeito específico, desde o ano 2003 ata o 2023 a Xunta de Galicia e o Colexio Oficial de Arquitectos de Galicia mantiveron unha colaboración continuada no apoio á elaboración de materiais e actividades didácticas e labores de actualización do «ProxectoTERRA», coa finalidade de formar, difundir e ampliar os coñecementos da poboación escolar galega en temas relacionados coa ordenación, planificación e intervencións das actividades humanas sobre o territorio.

Preténdese polo tanto, a través do presente acordo, continuar vinculando ámbalas dúas institucións, Xunta de Galicia e Colexio Oficial de Arquitectos de Galicia, na dirección e execución das actuacións obxecto do presente convenio, en aras dunha maior rendibilidade de esforzos no campo da formación en materia de ordenación e actuacións sobre o territorio, a vivenda e o dereito ao habitat.

Considerando todo o anterior, as partes manifestan a súa conformidade para formalizar o presente convenio que establece as condicións polas que se rexerá a cooperación entre a Xunta de Galicia e mailo Colexio Oficial de Arquitectos de Galicia para ampliar, difundir e manter actualizados os contidos do «ProxectoTERRA» realizado polo Colexio Oficial de Arquitectos de Galicia, de acordo coas seguintes

CLÁUSULAS

PRIMEIRA.- OBXECTO DO CONVENIO

O obxecto do presente convenio é establecer as condicións de colaboración entre a Xunta de Galicia e o Colexio Oficial de Arquitectos de Galicia, para dar continuidade ao traballo desenvolvido nas distintas etapas educativas, así como na formación á cidadanía en xeral, reforzando e consolidando a presenza do ProxectoTERRA, ao tempo que se abren novas liñas de actuación que permitan optimizar os recursos dispoñibles cara á mellor consecución dos obxectivos que se pretenden, realizando actividades de sensibilización, concienciación, formación e divulgación sobre os espazos e lugares que habitamos, a paisaxe e o dereito ao hábitat, conxugando a asistencia científica e técnica e o intercambio de experiencias con fins de formación e información interdisciplinares, coa finalidade de formar, difundir e ampliar os coñecementos da cidadanía, así coma das persoas técnicas e entidades competentes en temas relacionados coa ordenación, planificación e intervencións das actividades humanas sobre o territorio e a súa repercusión na conformación das paisaxes do presente e do futuro.

Para o cumprimento deste obxectivo establécese a seguinte programación de actuacións para os cursos lectivos 2024-2025 e 2025-2026:

1.- Elaboración, revisión e actualización de unidades didácticas e materiais de apoio en soporte papel e dixital, todo baixo unha perspectiva de xénero, para a súa integración nas aulas a través das TIC. Mantemento de aplicacións web, e renovación dos materiais audiovisuais formativos e divulgativos do ProxectoTERRA.



2.- Formación do profesorado para as distintas etapas da educación obrigatoria presentando os recursos educativos actualizados e de nova creación, e realizando os cursos de formación incorporados no Plan Anual de Formación do profesorado da Consellería de Educación, Ciencia, Universidades e Formación Profesional.

Abordar tamén a realización de cursos de formación específica para o profesorado das distintas etapas educativas, sobre as diferentes temáticas que aborda o proxecto, (paisaxe e territorio, educación patrimonial, dereito ao hábitat, cartografías e deseño de espazos educativos).

3.- Manter a presenza do ProxectoTERRA dentro do Plan Proxecta+ da Consellería de Educación, Ciencia, Universidades e Formación Profesional facilitando a participación dos centros inscritos na oferta das actividades complementarias, e sistematizando e divulgando os traballos realizados polos centros educativos dentro do seu marco.

4.- Manter, axeitar e ampliar a oferta de actividades complementarias dirixidas ás distintas etapas educativas, consistentes en:

Visitas guiadas de arquitectura-cidade e intercambios territoriais, (educación primaria e secundaria), así como a realización de obradoiros nos centros de Educación Infantil.

Novas actividades a iniciativa da APLU relacionadas co territorio, urbanismo e paisaxe e manter, axeitar e ampliar a actividade de *"Eu son inspector@urbanístic@. Coida do territorio. Coida do teu"*, servindo o ProxectoTERRA coma canle de entrada e facilitando a información e a súa oferta.

A execución da actividade *"Eu son inspector@urbanístic@. Coida do territorio. Coida do teu"* terá presenza efectiva durante todo o curso lectivo, cunha previsión orientativa de tres sesións mensuais, coa posibilidade de desenvolver esta actividade en 30 centros educativos por curso lectivo.

A convocatoria para participar na actividade, remitirase aos centros educativos dentro dos 15 primeiros días de setembro, e será acordada entre o Colexio Oficial de Arquitectos de Galicia e a Axencia de Protección da Legalidade Urbanística na comisión de seguimento.

A asignación de prazas realizarase na segunda quincena de setembro, garantindo o inicio das actividades na primeira quincena de outubro.

Na anualidade de inicio de vixencia do convenio, a convocatoria remitirase aos centros educativos nos 15 días seguintes á sinatura do convenio, procedendo a asignar as prazas nos 30 días seguintes á sinatura do convenio. Garantirase o inicio das actividades no mes seguinte á sinatura do convenio.

Co obxecto de dar maior visibilidade a esta vertente das actuacións no territorio, a asignación de prazas realizarase por orde de entrada, priorizando os centros que non participaron nesta actividade en edicións anteriores. Así mesmo tentarase que a asignación da actividade aos centros solicitantes sexa proporcional en todos os niveis educativos e equilibrada territorialmente.



Para as actividades desenvolvidas pola Axencia de Protección da Legalidade Urbanística elaborárase unha breve guía de seguimento para remitir aos centros seleccionados, co obxecto de facilitar a implantación desta actividade nos mesmos entendéndose incluída dentro dos traballos de organización do Colexio Oficial de Arquitectos de Galicia, debendo esta consensuarse coa Axencia de Protección da Legalidade Urbanística.

De consideralo necesario para o axeitado desenvolvemento das actividades complementarias as mesmas poderán incluír a produción e envío de material para a actividade, gastos de traslados dos docentes, edición de materiais divulgativos e creación de recursos dixitais ou de programación, entre outros, de apoio ou necesarias para o adecuado desenvolvemento das actividades programadas.

Actividades de asesoría e apoio a centros educativos de Educación Infantil, Primaria e Secundaria en colaboración con talleristas e persoal específico, co programa Sementeirás, obradoiros transdisciplinares para o alumnado.

5.- Difundir e divulgar, con carácter previo e posterior, todas as actividades e contidos do ProxectoTERRA a través das principais canles de difusión, espazos, colectivos e redes sociais, de acordo cón plan de comunicación conxunto que se fixe a tal efecto na comisión de seguimento, o cal deberá garantir a visibilidade fronte a sociedade do traballo desenvolvido dende Proxecto Terra, e dar soporte á difusión dos contidos propostos.

Continuar coa visibilización e participación de ProxectoTERRA en espazos, redes, colectivos, encontros, congresos nacionais, internacionais, etc, vencellados co obxecto do ProxectoTERRA e as súas áreas de interese.

6.- Deseño e produción dun congreso, seminario, actividades ou encontro que presente unha mostra e intercambio de experiencias para celebrar os 25 anos de ProxectoTERRA e divulgación do mesmo.

7.- Continuar co programa de formación continua da cidadanía co obxectivo de presentar as reflexións multidisciplinares sobre os lugares que habitamos, esencial para acadar unha mellor implicación da cidadanía na calidade da construción dos espazos que habitamos ao servizo dunha mellor calidade de vida, incidindo nun mellor coñecemento e respecto da nosa ordenación urbanística.

Na comisión de seguimento concretárase o contido e determinarase a finalidade perseguida por cada unha das liñas recollidas no programa de actuacións que consta na memoria xustificativa, así como adoptáranse os acordos que resulten precisos para dar resposta as incidencias que poidan xurdir durante a execución do convenio, variando de ser preciso, a porcentaxe que inicialmente representa cada unha das partidas programadas respecto do total do custe do convenio.

SEGUNDA.- CUSTE DO CONVENIO

O custo total estimado das execucións previstas neste convenio é de **trescentos sesenta mil euros (360.000,00 €)**, distribuídos nas seguintes anualidades:



ANUALIDADE	IMPORTE/€
2024	60.000 €
2025	180.000,00 €
2026	120.000,00 €
TOTAL	360.000,00 €

TERCEIRA.- OBRIGAS DO COLEXIO OFICIAL DE ARQUITECTOS DE GALICIA

O Colexio Oficial de Arquitectos de Galicia asume as seguintes obrigas:

1.- Asumir a organización da programación do «ProxectoTERRA», titularidade do Colexio Oficial de Arquitectos de Galicia, conforme ao previsto na cláusula PRIMEIRA.

2.- Contribuír con unha achega de **trinta e seis mil euros (36.000,00€)**, equivalente ao **10%** do custo das actuacións, nas seguintes anualidades:

ANUALIDADE	IMPORTE/€
2024	6.000,00 €
2025	18.000,00 €
2026	12.000,00 €
TOTAL	36.000,00 €

3.- Coordinar e xestionar o envío de todos os recursos elaborados a todos os centros públicos de Galicia, asumindo así mesmo os labores de organización, xestión e difusión das actividades complementarias.

4.- Garantir a difusión, publicidade e divulgación do ProxectoTerra con arreglo ao Plan de Comunicación elaborado pola Comisión de Seguimento nos termos expostos no punto quinto da cláusula PRIMEIRA do presente Convenio, asumindo tanto a produción e elaboración de contidos como á propia publicación.

A execución da presente obriga deberá comunicarse ao gabinete de prensa da Consellería de Vivenda e Planificación de Infraestruturas.

5.- O Colexio Oficial de Arquitectos de Galicia, como titular do ProxectoTERRA poderá asinar outros convenios de colaboración con outras entidades públicas e/ou privadas relativos ao ProxectoTERRA" sempre que non teñan un obxecto coincidente co do presente convenio nin supoñan unha sobrefinanciación.

6.- Así mesmo, para o desenvolvemento do obxecto, cando se deba realizar o traballo nas oficinas públicas, o Colexio Oficial de Arquitectos de Galicia nomeará unha persoa encargada do mesmo, que dirixirá e organizará a actividade das persoas traballadoras do mesmo alí destacadas, controlando, ademais, a execución do servizo, canalizándose a través de tal encargada as posibles incidencias que se formulen na execución dos traballos. Esta persoa encargada será a responsable da vixilancia do horario de traballo das persoas traballadoras, das licencias horarias, permisos ou calquera outra manifestación das facultades que lle sexan inherentes como empregadora.



CUARTA.- OBRIGAS DA XUNTA DE GALICIA

En razón das prestacións deste convenio, a Xunta de Galicia asume as seguintes obrigas:

1.- Colaborar na organización da programación do «ProxectoTERRA», titularidade do Colexio Oficial de Arquitectos de Galicia, conforme ao previsto na cláusula PRIMEIRA.

2.- Aportar, como máximo, a cantidade **trescentos vinte catro mil euros (324.000,00€)**, equivalente ao **90%** do custo estimado das actuacións, distribuída do seguinte xeito:

a) **Oitenta e catro mil euros (84.000,00 €)** con cargo á aplicación orzamentaria **41.03.521A.640.1** dos Orzamentos da Consellería de Vivenda e Planificación de Infraestruturas, nas seguintes anualidades:

ANUALIDADE	IMPORTE/€
2024	14.000,00 €
2025	42.000,00 €
2026	28.000,00 €
TOTAL	84.000,00 €

b) **Sesenta mil euros (60.000,00) €** con cargo á aplicación orzamentaria **37.03.423B.640.4** dos Orzamentos da Consellería de Educación, Ciencia, Universidades e Formación Profesional, nas seguintes anualidades:

ANUALIDADE	IMPORTE/€
2024	10.000,00 €
2025	30.000,00 €
2026	20.000,00 €
TOTAL	60.000,00 €

c) **Cento oitenta mil euros (180.000,00 €)** con cargo á aplicación orzamentaria **06.82.521A 640 01** dos Orzamentos da Axencia de Protección da Legalidade Urbanística, nas seguintes anualidades:

ANUALIDADE	IMPORTE/€
2024	30.000,00 €
2025	90.000,00€
2026	60.000,00€
TOTAL	180.000,00 €

Indicar que a participación da Axencia da Protección da Legalidade Urbanística na execución do Convenio inclúe a aportación de medios propios, persoais e materiais, no desenvolvemento da actividade complementaria *"Eu son inspector@urbanístic@. Coida do territorio. Coida do teu"*, aportación valorada estimativamente na contía de **nove mil oitocentos noventa e seis**



euros con dous céntimos (9.896,02€), tal e como se xustifica na memoria económica, en base ás horas invertidas polo persoal inspector na preparación e execución de dita actividade.

3.- Nas accións formativas que desenvolva a Axencia de Protección da Legalidade Urbanística, e nas que teña cabida, darase a coñecer o ProxectoTERRA para fomentar a súa difusión e divulgación, nos termos expostos no punto quinto da cláusula PRIMEIRA do presente Convenio.

4.- Facilitar ao Colexio Oficial de Arquitectos de Galicia, se fose o caso, información documental e estatística obrante nas súas dependencias e que considere necesaria para a actualización do «ProxectoTERRA».

5.- A Xunta de Galicia, a través da Axencia de Protección da Legalidade Urbanística participará activamente nas accións de concienciación e deseño de materiais escolares, ao tempo que propondrá accións divulgativas e de sensibilización na utilización racional do solo e da protección da paisaxe, e asistirá e participará en charlas e reunións que se realicen nos centros educativos.

Particularmente, a Axencia de Protección da Legalidade Urbanística colaborará na organización da actividade complementaria denominada *"Eu son inspector@urbanistic@. Coida do territorio. Coida do teu"*; e naquelas outras novas actividades complementarias que poida promover esta entidade.

Para as actividades que o Proxecto Terra desenvolva en colaboración coa Axencia de Protección da Legalidade Urbanística, reservarase un mínimo **25%** do custe total do convenio **(90.000,00€)**, esta porcentaxe poderase modificar de común acordo entre a Axencia de Protección da Legalidade Urbanística e o Colexio Oficial de Arquitectos de Galicia.

6.- Facerlle os libramentos ao Colexio Oficial de Arquitectos de Galicia, segundo as cantidades establecidas en cada anualidade á entrega dos traballos, obxecto do presente acordo, segundo as fases de aboamento e condicións que se establecen de seguido:

A).- Anualidade 2024:

Aboaranse **sesenta mil euros, IVE incluído (60.000,00€)**, contra a conta xustificativa achegada e certificada polo órgano competente para elo, por parte do Colexio Oficial de Arquitectos de Galicia, e que incluírá copia autenticada das facturas e xustificantes de gastos aos que faga referencia a indicada certificación, correspondentes ao noventa por cento **(90%)** do custo dos traballos xerados polo ProxectoTERRA.

A certificación conterá gastos relativos á renovación, ampliación e difusión dos contidos do Proxecto, á organización e difusión de actividades, á organización de xornadas de formación, á divulgación de recursos e documentos, así como ao mantemento dos medios de difusión do ProxectoTERRA no mundo educativo (web, comunicacións co profesorado, presenza no Plan proxecta+), sendo imprescindible que as facturas e demais xustificantes de gasto que se presente como parte da conta xustificativa conteñan unha descrición detallada do obxecto facturado/liquidado con expresa referencia ao ProxectoTERRA e o período do Convenio ao que corresponde.

A conta xustificativa será presentada ante Secretaría Xeral de Vivenda e Urbanismo, e o aboamento producirase logo da aceptación e conformidade da documentación xustificativa



presentada, pola Secretaría Xeral de Vivenda e Urbanismo, pola Consellería de Educación, Ciencia, Universidades e Formación Profesional e pola Axencia da Protección da Legalidade Urbanística.

A data límite para a presentación da documentación xustificativa correspondente á anualidade 2024 será o **15 de decembro de 2024**.

B).- Anualidade de 2025:

Aboaranse **cento oitenta mil euros, IVE incluído (180.000,00€)**, contra a conta xustificativa achegada e certificada polo órgano competente para elo, por parte do Colexio Oficial de Arquitectos de Galicia, e que incluírá copia autenticada das facturas e xustificantes de gastos aos que faga referencia a indicada certificación, correspondentes ao noventa por cento (**90%**) do custo dos traballos xerados polo ProxectoTERRA.

A certificación conterà gastos relativos á renovación, ampliación e difusión dos contidos do Proxecto, á organización e difusión de actividades, á organización de xornadas de formación, á divulgación de recursos e documentos, así como ao mantemento dos medios de difusión do ProxectoTERRA no mundo educativo (web, comunicacións co profesorado, presenza no Plan proxecta+), sendo imprescindible que as facturas e demais xustificantes de gasto que se presente como parte da conta xustificativa conteñan unha descrición detallada do obxecto facturado/liquidado con expresa referencia ao ProxectoTERRA e o período do Convenio ao que corresponde.

A conta xustificativa será presentada ante Secretaría Xeral de Vivenda e Urbanismo, e o aboamento producirase logo da aceptación e conformidade da documentación xustificativa presentada, pola Secretaría Xeral de Vivenda e Urbanismo, pola Consellería de Educación, Ciencia, Universidades e Formación Profesional e pola Axencia da Protección da Legalidade Urbanística.

A data límite para a presentación da documentación xustificativa correspondente á anualidade 2025 será o **15 de decembro de 2025**, podendo facerse liquidacións trimestrais.

C).- Anualidade de 2026:

Aboaranse **cento vinte mil euros, IVE incluído (120.000,00€)**, contra a conta xustificativa achegada e certificada polo órgano competente para elo, por parte do Colexio Oficial de Arquitectos de Galicia, e que incluírá copia autenticada das facturas e xustificantes de gastos aos que faga referencia a indicada certificación, correspondentes ao noventa por cento (**90%**) do custo dos traballos xerados polo ProxectoTERRA.

A certificación conterà gastos relativos á renovación, ampliación e difusión dos contidos do Proxecto, á organización e difusión de actividades, á organización de xornadas de formación, á divulgación de recursos e documentos, así como ao mantemento dos medios de difusión do ProxectoTERRA no mundo educativo (web, comunicacións co profesorado, presenza no Plan proxecta+), sendo imprescindible que as facturas e demais xustificantes de gasto que se presente como parte da conta xustificativa conteñan unha descrición detallada do obxecto facturado/liquidado con expresa referencia ao ProxectoTERRA e o período do Convenio ao que corresponde.



A conta xustificativa será presentada ante Secretaría Xeral de Vivenda e Urbanismo, e o aboamento producirase logo da aceptación e conformidade da documentación xustificativa presentada, pola Secretaría Xeral de Vivenda e Urbanismo, pola Consellería de Educación, Ciencia, Universidades e Formación Profesional e pola Axencia da Protección da Legalidade Urbanística.

A data límite para a presentación da documentación xustificativa correspondente á anualidade 2026 será o **15 de agosto de 2026**.

D) Pagos a conta

O Colexio Oficial de Arquitectos de Galicia poderá presentar solicitudes de pagos parciais con cargo ás partidas comprometidas anualmente pola Xunta de Galicia na medida que se produzan cumprimentos de obxectivos parciais xustificados mediante unha memoria na que se acrediten ditos cumprimentos, xunto coas facturas e transferencias bancarias que xustifiquen os gastos relacionados con eles.

E) Inexistencia de beneficio.

En todo caso, as cantidades aboadas serano para o pago dos gastos que se xustifiquen sen que o Colexio Oficial de Arquitectos de Galicia obteña beneficio ou lucro industrial algún.

QUINTA.- COMISIÓN DE SEGUIMIENTO

Coa finalidade de asegurar o cumprimento deste convenio, crearase unha comisión paritaria de seguimento, composta polos seguintes membros, un de cada unha das entidades asinantes: o secretario xeral de Vivenda e Urbanismo ou persoa en quen delegue pola Consellería de Vivenda e Planificación de Infraestruturas; a Directora Xeral de Ordenación e Innovación Educativa ou persoa en quen delegue pola Consellería de Educación, Ciencia, Universidades e Formación Profesional; a directora da Axencia de Protección da Legalidade Urbanística ou persoa en quen delegue; e polo Colexio Oficial de Arquitectos de Galicia o Decano-Presidente ou persoa en quen delegue. Dita comisión actuará como mecanismo conxunto de plena efectividade e reunirse a petición dunha das partes.

Con carácter ordinario, a comisión de seguimento reunirse dentro do mes anterior ao de inicio de cada trimestre có fin de avaliar as incidencias xurdidas durante a execución do ProxectoTerra no trimestre anterior, así como para concretar os termos nos que deberá executarse durante os seguintes trimestres a programación establecida na cláusula PRIMEIRA do convenio.

Con carácter extraordinario, no ano de inicio de vixencia do convenio a comisión de seguimento reunirse dentro dos 30 días seguintes á data de sinatura do convenio.

Dos acordos adoptados deberá deixarse constancia mediante acta.

SEXTA.- COMPETENCIAS DE INTERPRETACIÓN E RESOLUCIÓN



No presente convenio, que ten natureza administrativa, correspóndelle á Xunta de Galicia, previo os informes e actuacións pertinentes, ostentar a prerrogativa da súa interpretación e resolver as dúbidas que xurdan sobre o seu cumprimento, sendo os acordos neste senso inmediatamente executivos. A competencia, para coñecer da impugnación dos seus acordos, correspóndelle a xurisdición contencioso-administrativa.

SÉTIMA.- RELACIÓNS LABORAIS

A subscrición do presente convenio non implica relación laboral, contractual ou de calquera tipo, entre os profesionais que desenvolvan as actividades e a Xunta de Galicia, de tal modo que non se lle poderá esixir responsabilidade algunha, nin directa, nin indirecta, nin subsidiaria, polos actos ou feitos ocorridos durante a execución das actuacións e/ou a vixencia do presente Convenio.

OITAVA.- MODIFICACIÓN, DENUNCIA E CAUSAS DE RESOLUCIÓN

As partes poderán modificar ou resolver este convenio en calquera momento por mutuo acordo.

Así mesmo, poderán denunciar este convenio en calquera momento por vontade expresa de calquera das partes cun preaviso de quince días naturais.

O presente convenio resolverase:

- a) Polo incumprimento total ou parcial dalgunha das cláusulas que o regulan.
- b) Polo transcorrer do tempo estipulado sen que o Colexio Oficial de Arquitectos de Galicia xustifique nos termos establecidos na cláusula cuarta do presente convenio, a realización obxecto do mesmo.

NOVENA.- RESULTADOS CONXUNTOS

Cos resultados como consecuencia das actuacións previstas neste convenio de colaboración, elaborárase un catálogo e diverso material promocional, continuando na dinámica xa implementada en anos anteriores, coa participación activa da Axencia de Protección da Legalidade Urbanística, que serán de uso e titularidade común de ambas partes asinantes.

Calquera modificación dos resultados deberá ser autorizada por ambas partes, porén a Administración Xeral da Comunidade Autónoma, no cumprimento dos seus fins institucionais, poderá utilizar libre e gratuitamente os traballos, materiais e manuais, informes e conclusións que se deriven da participación no presente proxecto. En todo caso nas accións de difusión de datos e informes obtidos pola execución desta campaña farase sempre referencia ao presente convenio.

DÉCIMA.- Consentimento das partes en materia de protección de datos.

A sinatura do presente convenio suporá o consentimento expreso das partes asinantes para engadir e facer públicos os datos persoais que consten no convenio, e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno (DOG núm. 30, do 15 de febreiro) e o Decreto 126/2006, do 20 de xullo, polo que se regula o rexistro de convenios da Xunta de Galicia (DOG núm. 149, do 3 de agosto).



As persoas asinantes deste convenio manifestan o seu consentimento para que os seus datos persoais que aparecen neste e mailo resto de especificacións nel contidas poidan ser publicados no Portal de Transparencia e Goberno Aberto.

As partes asinantes manifestan que coñecen e que cumprirán as estipulacións relativas á protección de datos persoais establecidas no Regulamento (UE) 2016/679, do Parlamento Europeo e do Consello, do 27 de abril, relativo á protección das persoas físicas no que respecta ao tratamento de datos persoais e á libre circulación destes datos, e na Lei orgánica 3/2018, do 5 de decembro, de protección de datos persoais e garantía dos dereitos dixitais.

As partes adoptarán as medidas de seguridade precisas para que toda persoa que interveña na organización e o desenvolvemento das actividades formativas derivadas deste convenio:

1º Respecten o deber de confidencialidade en relación cos datos persoais que sexan manexados no exercicio das competencias derivadas deste convenio.

2º Se limite na medida do posible o acceso aos datos de carácter persoal.

3º Se traten os datos persoais exclusivamente para a finalidade prevista neste convenio.

Así mesmo, as partes asumen a obriga de non ceder os datos de carácter persoal a terceiros, salvo nos casos en que exista unha obriga legal.

UNDÉCIMA.-VIXENCIA

Este convenio entrará en vigor ao día seguinte da súa sinatura, estendendo a súa vixencia ata o **31 de agosto de 2026**, sen prexuízo da autonomía da vontade das partes asinantes para efectuar addendas ao mesmo.

En proba de conformidade canto antecede, as partes asinan electronicamente este documento.

O conselleiro de Educación, Ciencia, Universidades e Formación Profesional, Román Rodríguez Gonzalez.

A conselleira de Vivenda e Planificación de Infraestruturas, María Martínez Allegue

A directora da Axencia Galega de Protección da Legalidade Urbanística, María Victoria Nuñez López

O decano- presidente do Colexio Oficial de Arquitectos de Galicia, Luciano González Alfaya

